

Hoizfeih

Fog raemxheu ndeu, moux nazbiz ndeu, gij cingzgeih ranzmbanj gaeng lumj singfwen nei heux youq henzrwz. Go'nywj gofaex hoenghhwdhwd, duzbid duzroeg heuhceuceu. Ndaw suen iq, geij cik namhhenj, go byaekhaemz dog did youq gizhaenx, heuswdswd, yinx gou dauqngeix gij saeh gaxgonq.....

Seiz lwgnyez, baenz suen saekheu lij caengz loenq liux, seizhah caet nyied couh mbouj yiu, cix daengz, gij damsim guh' angq gou hix riengz nywj faex did hoenghhwd. Youq rog buenq gyaengh ciengznamh, yo miz hauilai yinxdaeuz. Mbwn ciemhciemh buemx, gou cij ngaizngednged ma ranz. Gou yamq haeuj ranzdajcawj, youq ndaw heiqlwi ngeungeu haenx, myaegraen buenq bat byaekhaemz, heumyigmyig lumj youz, dajcang hawj aen ranzdajcawj engq miz rengz-hoengh. Daxbuz cingq song fwngez riengjret mbit byaek swiq byaek, caenh raen daxbuz fajfwngez baez yaengx, gij sing faeg byaek haenx con haeuj rwz gou daeuj. Byaekhaemz gvailolo ninz youq gwnz heng, nyaemhcaih fagcax ronq de. Riengz roengzdaeuj, ciep raemx,

dwk feiz, cuengq byaek, daxbuz fwngez mbouj dingz mbouj duenh, ndang baenqlulu, youh dwk gyu dwk youz, yaep he rek dang byaekhaemz ndeu couh ok rek lo. Gij byaekhaemz yienznaeuz cawj cug lo, dauqlj heuswd, lumjbaenz baez mbouj siujsim couh daj ndaw vanj ndonjdeuz.

Heiqfwi gyuemluemx, gij heiqlhaemz haenx con haeuj ndaw ndaeng, youq ndaw uk gou banhsanq. "Haemz!" Gou ngauzgyaeuj degdeg. Daxbuz riunyumnyum: "Lai mupmup couh habhoz lo." Gou najbyak nyaeuqyatyat. Mbouj geij nanz, caiq baez sawq mup, caenh mup raen gij haemz ndawde lai miz di hom ndeu. "Cimzcimz lu." Muenghyawj najriu daxbuz, gou siujsim riri yaeuj aenvanj hwnj, ndoet gaemz ndeu. Ngamq haeuj bak, caenh roxnyninh heiqlhaemz cog hoz, ndwnj mbouj roengzbae. "Bi! Haemz dai lo! Neix baenzlawz gwn?" "Lai cimzcimz couh roxyiuj gij feihdauh de lo." Gij najnyaueq daxbuz lumj luzraemx, fubfed youq gwnz naj huzswnh de. Gou caiq baez yaeuj vanj, menhmenh cimzgwn moix ndik feihdauh, raq homsisi he lumj raemxsaw nei roenx haeuj

ndaw sim bae, gij angqyangz hix baez di baez di youq ndaw sim langghai. Caiq yaeuj vanj, gaemz dog ndoet liux, gij homfwd haenx vanzlij youq ndaw hoz gvaengxgvax, hauilai nanz mbouj sanq.

"Gij dang byaekhaemz, couh yaekaeu sijsaeq cimzfeih, ngamq haeujbak caen dwg haemz, cijmiz hoizfeih caeuq dajcimz, cijndaej cimz ok gij hom de daeuj." Gawq vah neix caeuq gij feihdauh vanj byaekhaemz haenx itheij gaek youq ndaw sim gou. Hoizfeih, baenzneix gyaenanz raezrangh, gij hom de yaemq haeuj sim vunz bae, hawj raeuz saedcej bienq ndaej engq ndei. Moix baez yaepyit cungj miz gij eiqsei mbouj doengzyiengh; moix cungj feihdauh cungj hawj vunz miz gak cungj dauqngeix. Caenh' aeu mwngz ra ndaej raen de.

Aen suen iq haenx, yienznaeuz geiqciet gvaq le gingjsaek hix bienq yiengh, hoeng go byaekhaemz haenx gij feihdauh de lij ciuqyiengh hawj raeuz roxnyninh miz seiqsei. Gij rengzhoengh de ciengxlwenx yaenq youq ndaw sim.

(Bwngez Yiyenz raiz
Yinj Fuzgen hoiz)



Gaeb Vaiqvued

☐Don Gezsinh

Dahcej naeuz yaek daiq gou bae gaeb vaiqvued
Gou sikhaek dapwngq lo
Vaiqvued youq gizlawz ne
Yaepyet gou couh fatyienh lo

Yawj
Vaiqvued ndoj youq laeng byoz nywj
Nywj engq heu lo
Vaiqvued ndoj youq laeng daizva
Va engq nding lo
Vaiqvued ndoj youq laeng dujfwj
Fwj engq hau lo
Vaiqvued ndoj youq laeng daengngoenz
Daengngoenz riu lo

Raq rumz ndeu ci daeuj, baenz duj baenz duj va' gviq loenq daengz gwnz mbaq gou.

Va' gviq doenghyupye, lumj-baenz miz sengmingh nei, lumjnaeuz cingq lwnhgangj gij vunz, gij saeh, gij cingzgeih haenx.

Gou ndaejgeiq, daxgoeng hwetgaeuz. Dou gig noix dauqma lajmbanj yawj de, it bi cix dauqma baez song baez, hoeng, moix baez dauqma, gou couh cibfaen maqmuengh, maqmuengh ndaej raen go va' gviq gyanghonger, gij yiengh hai va rimrangh haenx.

Youh daengz seizcou lo. Gou caeuq daxboh hwnjroen baema lajmbanj, itloh doegdanh soegsoux, dauqdaej daengz ranz lo. Mboujcaengz haeuj bakdou, couh sup ndaej gij heiqrang va' gviq. Gou couh haidin cung haeuj gyanghonger bae, angqvauvau dwk cimyawj gij va' gviq gwnz go. Gij nditndat con gvaq nyefaex ciuq daengz gwnz naj gou, gij heiqrang va' gviq, biu haeuj ndaeng gou, gou ngahngwdngwd dwk sup ha sup..... Goeng gou riugoeckgoek byaij gvaqdaeuj, yaeng' yaeng mboengj mbaq gou: "Gyoengqsou ma lo, dauq daengz couh ndei lo, dungxiek caengz? Goeng guh gau va' gviq cei q ndeigwn haenx hawj mwngz gwn!"

Gou song da baez rongh, buet haeuj ranz baihdaw aeu aen daengq iq ndeu daeuj, lauxsaed dwk naengh daengz henz ndang daxgoeng.

Mwh daxgoeng dawz va' gviq dubsoiq caeuq gij mba haeuxcid doxgyaux, heiqrang fwt seiqcawj sanghai.

Seiz Va' gviq Biurang



Gij rang va' gviq neix hawj vunz yaek fiz bae.

Daxgoeng lumj roxyiuj gou sim siengj gijmaz: Youq ndawsingz baenzlawz hix mbouj ndaej gwn gij gau va' gviq yienghneix rang. Dax-goeng doq cai mbahaeux doq naeuz: "Daxboh mwngz seizi q caeuq mwngz ityiengh, caemh haengj gwn gij gau va' gviq gou guh. Mboujgvaq de seizhaenx manz lai, seiz gou guhhong de cungjdwg youq henz napnap gizneix, faenjfaenj gizhaenx..... Doeklaeng, caemh hag ndaej gij dinfwngez gou lo."

Dingqnyi daxgoeng yienghneix gangj, gou caemh simdoengh lo, couh siengj roengzfwngz sawqguh. Couh yienghneix, gou couh vazdawz gaemz mbafaenj haeuxcid ndeu cuengq

daengz gwnz va' gviq bae, aiya, vaih lo! Gaemz mba cai nyaz lo! Baez simgip dinfwngez engqgya luenhloeploep. Gou ganjgip heuh daxboh gvaqdaeuj, dawz gij mba faenj nyaznywd haenx cungj vut hawj daxboh. Daxboh liuq gou da ndeu le riu lo, vid genbuh haifwngez couh cai gaemz mba. Cai dwk cai dwk, gou roxnyninh daengx hongh cungj roenx gij rang va' gviq.

Gou naengh youq baihhenz, yawj gij yiengh daxgoeng caeuq daxboh boenqfoedfoed haenx, gag boiqfug gyoengqde gapgoeng caen doxhab. Daxgoeng caeuq daxboh lumj dwg ngeix daengz gij seizgan nanzndaej doxbuex neix, gangjgangj riuriu bak mbouj dingz.

Gau va' gviq cai ndei le,

daxgoeng dawz roengz aencaengq bae naengj, sam boux dou couh naengh youq laj go va' gviq cajdeq. Rumzhaemh cififi, daxgoeng yawj bae coh aen daengngoenz gizgyae couh yaek doekconghe haenx, yaeng' yaeng dwk haibak naeuz: "Lwg ha, sou yawj, doengngoenz yaek doek roengzbae lo. Gou cungj ngeix, miz saek ngoenz, gou hix lumj de yienghneix doek roengzbae, hoeng dauq mbouj rox caiq swngwnj lo. Gou bi' ndwen geg lo, lij ndaej gyaeu geij bi dem?" De dingz yaep he: "Gou cungj muengh, muengh gij saedcej mwngz caeuq dahni q dauqma yawj gou haenx, sou bi daengz haemh couh dauq ranz baez song baez, gou cungj raen mbouj gouq ya!"

Gou cimyawj gij va' gviq biuloenq haenx, mbouj oksing.

Gou rox daxgoeng dwg gangj hawj doxboh dingq.

Daxboh nyaenx mbouj ndaej raemxda, mwh raemxda lae roengz seizhaenx, gou lumjnaeuz mingzbeq lo. Gij va' gviq rim go neix geiq rim gij caencingz naekna daxgoeng caeuq daxboh, cungjdwg mbaet hix mbaet mbouj liux, beng hix beng mbouj goenq. Gij gyaex haenx gek cien bya fanh raemx cungjaeu doxbungz doxdaemj.

Gau va' gviq naengj baenz lo, daxboh doep mbaq daxgoeng, sing unq naeuz: "Gou itdingh ciengz dauq ranz yawjyawj."

"Ciengz dauq ranz yawjyawj, yawjyawj gij yiengh mwngz." Gou youq ndawsim gag naemj.

(Moz Hanznih raiz
Vangz Caijsen hoiz)